

## De Arm werd körzer!

Om Mittwochmiddaach hadde merr all sesomme enn kloone Spaziergong gemacht unn wollde doodenooch ins Joffche enoi, enn Eppelwoi drinke unn e Worschtplatt esse. Weil unser Fraue awwer grad die Nochbern vom Kättche gedroffe hadde, unn wie se halt so sinn, wennse erst emol oogefonge hawwe ze babbele, heern se su schnell nimmi uff, hawwe mir drei, de Karl, de Schorsch unn ich, vor de Grauweschul gestonne unn hawwe uff se gewart.

Was mache se dann, hott de Schorsch gefroocht, bei wem stehnse dann unn babbele? Doo sacht de Karl: Die stehn bei de Gretel unn unnerhalle sich bestimmt widder iwwer Kronkheite - ei siehst de dess nit? De Schorsch guckt e bisje matt: Ich habb doch grad moi Brill in moi Jack gesteckt, dasse e bisje oogewärmt werd, die laaft merr sunst oo, wenn ich in die Wertschaft kumm unn dann seh ich erst emol gar nix.

Mir stehn also doo, gucke die Strooß enunner unn enuff unn gucke aach zu dem Kebab-Lade eniwwer, grad wie doo zwaa auslännische Mädcher mett Dudde in de Händ eraus-kumme. Scheene Meedcher, habb ich gesacht. Unn was die ferr scheene Hoorn hawwe, nickt de Karl. Unn was die ferr scheene große Schritt mache, moont de Schorsch, noochdem er soi Brill widder uffgesetzt hott. Unn mir drei gucke dene zwaa hinnerher, wie se die Holzgass enunner gonge sinn.

Doo sach ich unn guck awwer erst noch emol zu unserne Fraue, ob die aach noch weit eweg sinn: Mir drei missde widder emol e schwarz Partie mache. De Karl peilt aach die Laach unn grinst: Oh ja, nooch Rüddessem! Doo dete merr widder emol donze, gell? Aach de Schorsch dreht sich um unn schätzt die Entfernung zu soim Kättche: Ich det schunn gern widder emol donze mett ooner, wo ich mein Arm drummerum krieh! Weil wenn ich mettem Kättche donze due, moon ich immer, moin Arm wär körzer worrn!

Mir hawwe all gelacht. Dann schittelt de Karl de Kopp: Nooch Rüddessem, dess krieh ich dehoom nit dorsch. Unn de Schorsch moont: Merr missde mettem Zuch fahrn, hie unn zurick, dess iss su deier, su vill Sunndaachsgeld habb ich nit. No ja, dann ewe nit, habb ich die Achsele gezuckt. Dann hawwe mir drei widder uff de Oigong vom Kebab-Lade geguckt, awwer ess iss nor noch su en Plattkopp erauskumme.

In dem Aacheblick stieht die Paula hinner uns und sacht: Wollt ihr doo driuwe noi odder ins Joffche? Was hawwe se dann, unser Männer? - die gucke so komisch, moont doo dess Kättche.

Unn moi Fraa druff: Merr waaß, was die widder geschwetzt hawwe, merr konnse koo fünf Minute eloo losse.

Ich habb mich als erster gefonge: Och, mir hawwe iwverm Schorsch soim Arm geschwätzt. Ja, weil der su kurz worrn iss, sacht de Karl.

Ja, nickt doo de Schorsch, dess habb ich in letzter Zeit efter gemerkt: Wenn ich beim ... beim Joffche uff de Bonk sitz unn enn Ep-pelwoi drinke will, kumm ich garnimmi onns Glas.

Doo guckt dess Kättche ihrn Monn oo unn sacht: Waaßde warum du nimmi iwverall hie kimmst? Nit weil doin Arm ze korz iss, naa, weil doin Bauch ze dick iss! Awwer auf, gehn merr enoi, ich habb Dorscht!

Eiern Honnes